



## KENYATAAN MEDIA

1 Julai 2016

### **UKR UniMAP BERHIBUR SAMBIL BERAMAL CERIAKAN ANAK-ANAK RUMAH TEDUH**

Kangar, 1 Julai – Unit Kebudayaan dan Rekreasi (UKR) Universiti Malaysia Perlis (UniMAP) menganjurkan program menghibur sambil beramal bersama 27 Anak-Anak Yatim Pertubuhan Kebajikan dan Amal (Rumah Teduh), di sini baru-baru ini.

Pengarah UKR, Mohd Izwan Izhar Haris berkata, program sempena majlis iftar bersama anak-anak kurang bernasib baik itu berlangsung dengan aktiviti santai persembahan ‘busking’ amal oleh pemuzik dan penyanyi UKR.

Katanya, selain persembahan tarian dan nyanyian, persembahan Kumpulan Sakan Raja Lawak turut memeriahkan program itu bagi menceriakan anak-anak berusia empat hingga 22 tahun itu.

“Selain menghiburkan mereka, pihak UKR turut menyampaikan sumbangan iaitu makanan, kelengkapan menyambut Aidilfitri dan duit raya bagi meringankan beban mereka,” katanya selepas menyampaikan sumbangan berkenaan.

Hadir sama Pengurus Rumah Teduh itu, Harisun Abdul Rahman dan suami beliau yang juga guru agama Rumah Teduh, Azim Zaidi Abdul Rahman.

Menurut Mohd Izwan, lebih istimewa apabila juadah berbuka bagi majlis iftar mereka mendapat tajaan daripada Restoran Peladang selain kakitangan UKR sendiri turut menyediakan makanan secara ‘potluck’.

“Suasana meriah dengan bertukar-tukar merasa juadah secara tidak langsung dapat mengubat hati anak-anak rumah ini terutama yang masih kecil dan belum mengerti apa-apa.

“Sebelum meninggalkan Rumah Teduh ini kami meluangkan masa bermain bunga api dengan pengawasan bersama-sama anak-anak kecil yang begitu teruja dengan kehadiran kami ke sini,” katanya.

Selain UKR sendiri, program amal dan majlis iftar ini turut mendapat kerjasama Biro Tatanegara Negeri (BTN) Perlis.

**Dikeluarkan Oleh :**

**Aininulniza Mohd Yusof ([aininulniza@unimap.edu.my](mailto:aininulniza@unimap.edu.my))**

Pegawai Perhubungan Media UniMAP